

摘藻堂四庫全書薈要

集部

欽定四庫全書會要卷一萬九千三百九十五

集部

皇清文頴卷首十八

御製文

賦

書同文賦

偉哉書契之盛也麗光天而有耀敷海宇而無垠掌之  
保氏而肇夫小學觀乎人文而成彼大勲代結繩而為  
治因載道以稱神洋溢之風普扇光華之治聿新書紀

導道導路記稱同軌同倫固草野咸欽其法式抑巖廊  
用布其絲綸繫夫庖犧造書倉頡創字蝌蚪成形魚鳥  
誌瑞原所始作不一其類迨後八體漸分六書遂製或  
篆隸而殊科或戈之異制或偃露湧泉而稱工或離  
星垂珠以布勢或揭象魏之條或質歲成之計或遊元  
圃之麟或折蟾宮之桂莫不依乎典則遵我王章錯綜  
以盡其術採撫以備其詳藻耀乎典冊之府輝煌乎翰  
墨之場指事象形之中則協聲轉注之允臧潤太平而

有色宣文治於重光於是靖萬慮之紛拏布一人之大  
化金殿春永而閣帖臨餘玉筆龍飛而黃麻草罷欲加  
點而無有詎一畫之可假昭萬里之同風自一人而逮  
下明廷敷奏曾無馬字之訛在野遵從何有魚書之詐  
則知聖人有作書文大同自南自北自西自東光如日  
月之燭遐屆舟車所通布章程於畫一闡治理於鴻濛  
豈操觚而濡墨者徒工技雕蟲也哉





聖德合天地賦

聖人膺寶籙握靈圖躋含生於富壽致萬類之昭蘇澤  
允覃乎九有道克奉乎三無欽明文思帝堯無以踰也  
溫恭允塞虞舜曷以加乎紀魏魏與蕩蕩信一揆而同  
符天無不覆地無不載蒼蒼者昭丕冒之宏混混者順  
發生之大窺博厚而難名測包容而無外是亘古此天  
地也而誰與為對待哉王者中和位育並立為三規模  
既同乎幬載對越尤致其精嚴故升中於天而鬼神格

告成於地而恩澤覃茂以對時而行无妄卑以自救而  
體福謙於是歌一德之允若與二儀而脗合布政則溫  
如春融育物則量同海納明如日也麗九華以昭宣散  
如風也紀八節於閭闔然而高明既被朝夕彌虔昭事  
則幾康是飭行健則元會永綿小心翼翼是曰法天若  
夫廣大咸亨品物必遂既柔順而利貞亦履仁而行義  
安土能敦是曰則地於是乎乾坤合德君師並修海宇  
仰崇高之象羣靈樂靜謐之休徧尊親於血氣成參贊

之謨謀豈非與清寧而永奠合上下而同流者哉



麥秋賦

繫鶉火之司令疑商金之屆期影度朱明始散芳於榴  
圃律侵白帝獨抽穗於麥畦愛芄芃之連纈亦離離之  
下垂南畝正勤於此日西成偏紀乎茲時披梅風而含  
穎潤穀雨而雙岐是蓋四時之代序而萬物各遂其繁  
滋者也乃其隄上鶯啼隴間雉雊芳草未歇而猶菲綠  
樹成陰而始就何銍艾之奄觀兮當隆曦之永晝觀黃  
雲之滿野兮驚白藏之應候溽寒露而朝濡兮潛陰呂

而夕秀雜收斂於長養兮參結實於紛茂炎炎當令碩  
碩成行紫莖兮韞爽青穗兮含涼大有占而豐登肇象  
兮中和順而隴畝飛香對銀縹而偶穗兮散珠顆而分  
芒豈非化工之獨運而為盛世之嘉祥也哉

學問至芻蕘賦

原夫泰岱之高不讓土壤而尊五嶽河海之廣不擇細  
流而納百川載萬物而不盈者曰地覆羣有而不居者  
唯天是以有大而能謙必豫見善而能遷始賢固至理  
之如此豈入道而不然蓋自先民有言詢於芻蕘旣下  
問之不恥乃大德之孔昭野無遺才英俊彈冠夫廊廟  
政皆不應庶人罷議於市朝固已五風順十雨調集濟  
濟之多士覩師師於百僚然而謙謙君子延訪不遺夫



草莽穆穆元后諏諮乃逮夫新樵是以禹下昌言之拜  
湯勤有莘之招高宗恭默而得左右於巖野周公勤思  
而傳吐握於崇朝凡其守謙以受益用是居上而不驕  
爾乃設鐸設鞀而蒿萊亦及爰咨爰度而草澤無餘道  
至廣也豈必備乎垂衣之主心之虛也乃旁求於戴笠  
之夫邇言不棄良材必選大度於是乎彰隆業因此而  
顯戒損用以持盈得師期乎主善此聖王樂取之誠心  
而非徒規倣乎先民之舊典

五六天地之中合賦

以敬授民時聖人所先為韻

繫鴻濛之塊垺兮肇兩儀而互應昭法象之崇卑兮紛  
萬物其繁盛羌孰體夫天心兮伊誰契乎地柄揭造化  
之元樞兮示羣生以金鏡粵若宓義畫卦而知一元之  
廣運亦越周文繫彖而明三才之有正於焉定歲序乎  
星辰總以握綱維於祇敬爾其渾淪初分經緯斯究奇  
全偶半地天恰配乎朔南兼兩函三剛柔各居其左右  
積五位以相乘合六爻而互就置閏則道在歸奇積策

則法惟用九載在周禮屬太卜之攸司稽乃虞書實歲和之所授孰云一三二四之當前與夫七九八十之應後此蓋陰陽定位其運乃神至聖觀象用以前民來復而知履端於子交泰而識建統於寅覘氣候於十有二月驗歲差於三百六旬彼夫土圭銅渾之是製保章馮相之所陳或北陸而成歲或東嵎以紀春豈能外大衍之名數總萬有之紛綸若乃衍母衍子各殊其用大餘小餘不紊其時雖月窟天根眇忽難窮其象罔而乾維

坤絡翕闢自著其端倪天五得其中也地六從而合之  
五挈陽樞五五二十五數而不忒六維陰紐六六三十  
六宮而咸宜於以協大中之運於以定保合之規乃其  
變化相尋權輿斯定天數六為用而五為體倍其五兮  
天干盈地數五為君而六為臣重其六兮地支竟氣降  
為味兮聿觀大化之所由敷民受以生兮乃識萬彙之  
所從孕圖呈龍馬兮妙用協造化之奇象著龜書兮至  
瑞應憲天之聖辨方辨卦定至定分六甲為日五子維

辰十一而道畢六十而數均極其數兮遂定天下之象  
通其變兮遂成天地之文陽奇陰偶兮合而言之曰易  
天圓地方兮中而處者惟人茲五六之迭乘兮實形生  
之橐籥惟中合之妙構兮顯天地之網緼於是順布五  
行修和六府言乎理兮健順統會乎苞符言乎器兮權  
度不差夫絳黍用布令於提挈遂紀元於章部占鳥火  
虛昴而定歲功乘震兌坎離以致時序豈其事事而為  
之則物物而為之所哉重曰居寰中以御極兮道在節

宣察璣衡以齊政兮聖人我先愧參贊之靡易兮凜若  
冰淵顧民事之綦重兮時罔或愆敷五典與六職兮取  
法自然期無逸以勤恤兮欽若昊天



恭祝

聖母皇太后萬壽無疆賦

有序

伏聞累洽重熙光啟壽昌之運垂恩儲祉慶延

慈訓之隆惟懿德在躬以至仁為茂育斯降年有永自  
諸福之駢臻我

聖母崇慶慈宣皇太后

化協乾樞

恩周坤絡



興媯佐譽申錫久而長發其祥

明德宣仁垂裕深而並受其福茲值仲冬之月欣逢  
萬壽之期禹甸春回堯封慶洽集衣冠於萬國率拜舞  
於千官共稱北斗之觴竊擬南山之頌謹拜手稽首  
而獻賦曰

惟坤德之無疆乃自天而凝命既體順以承乾適鍾祥  
而衍慶王母受介福遠垂羲易之文京室紀徽音載詠  
周詩之盛禮崇尊養會下國之共球律轉陽和運中天

之璣鏡桃熟三千之候愛日舒長山呼萬歲之聲慈雲  
高映占南極之光華奉

東朝之溫清擁佳氣於蓬萊共欽瞻於

慈聖

徽號極域中之尊至仁為天下之

母配天而虔奉三無應地則含弘九有永彌性以優游  
介繁禧而昌後竊欣

膝下之承歡就養無方於左右黃裳中正開長信而禮

治宮庭

彤幄輝光出甘泉而瑞盈郊  
輶挹天酒以潤芳護迴鳳輦  
而縈宮柳臨華渚以逍遙邁  
斗維之悠久於時律中黃鍾  
日臨嫫女驗添線於金針候  
吹葭於玉呂恭逢誕聖之辰  
正協履長之序聲傳絳幘尚  
衣初進雲裘光映朱霞列樹  
猶然彩炬引

璇宮之法駕盛儀衛於鈎陳  
振丹陛之元音應鏗鏘於鐘  
簴雲開扇影瞻

寶座而奏瑤牋香裊爐烟啟芳筵而斟桂醕躬舞蹈以  
奉觴循玉除而容與歡騰薄海慶溢敷天曠代之苞符  
輻輳殊方之寶賁駢闐九葉金芝吐榮華於天秀萬年  
玉冊銘琬琰以神鐫雲綃呈織女之機七襄錦麗寶鬢  
綴仙人之珥四寸珠圓饌龍根而待御擘麟脯以烹鮮  
紫府之瓊漿若醴華封之碧藕如船盡入充庭之貢並  
登介壽之筵若乃車書南北尉候西東競廁身於朝列  
隨稽拜於臣工共晉九如之祝羣欽萬福之同聽仙韶

之應節覩瑞靄之浮空鳳舞鸞歌奏鈞天而陳廣樂雲  
蒸霞蔚揖金母而拜木公花滿瑤池之上籌添海屋之  
中信上元之資福綿景祚於無窮臣祇奉

母儀儼同天覆幸當清晏之期喜值文明之晝遊觀上  
苑効扶持於

鑾輿瞻望

春暉煥斑斕於舞袖天開有道之祥星紀長庚之宿仰  
純嘏之緝熙兮荷貽謀之孔厚愧頌颺而莫罄兮願福

祿之永茂自今以始兮八千春長祝  
慈幃兮無量壽



# 建福宮賦

居寰中以御物凜

天命兮難謹懼大業之弗勝恒乾惕兮小心戒峻宇與  
雕牆鑒酒池兮肉林愧饑溺其未解遑安逸兮是尋乃  
者新宮落初玉祀金鋪初名建福義何居乎蓋是地也  
圍於宮牆而弗加擴卑於路寢而弗增華畏炎歊之相  
逼乃託興於清嘉儉不至陋幽而匪遐況在重華之右  
重華宮朕舊居比之興慶之宮未費司農之帑何勞庶  
也在新宮之左



民之攻經之營之募千夫而齊力如松如竹閱數月而成功於是殿方馭娑宮比駘盪長春長樂披青簡而空傳太和保和凭朱欄而相望千門萬戶兮想漢制之太奢茅茨土堦兮欽堯儉之堪尚軒號靜怡兮期成性之常存齋名敬勝兮恐舉念之或妄亭顏惠風兮欲膏澤之旁敷閣扁延春兮與羣生而咸暢觸目警心兮守此志而始終居安思危兮常塵懷而籌量爾其文石矗立嘉木叢生羅芝田兮蕙畹來燕賀兮鶯鳴披薰風兮思

解慍對時雨兮樂向榮觀太宇兮調元化育萬物兮驗  
農耕又何必焚隋廷之甲煎樹漢苑之金莖歌陳宮之  
玉樹聽唐曲之新聲而始稱悅情也哉於時而春覽生  
意而欣欣於時而夏遠煩暑而灑灑乃其秋也偉西成  
之可慶乃其冬也體貞元之凝命載色載笑奉

慈闈而承歡來游來歌與良臣而交儆於以承先厘肯  
構而勿忘於以示後庶斯言之是聽重曰洪範有言斂  
時五福敷錫庶民與時茂育予宅是居心乎肅肅受

天之祐匪藉田燭建民之極匪侈華屋繼繩光烈對越  
於穆進賢納諫懲惡旌淑志苟懷安是謂不穀尚慎旃  
哉永膺

天祿

盛京賦 有序

嘗聞以父母之心爲心者天下無不友之兄弟以祖宗之心爲心者天下無不睦之族人以天地之心爲心者天下無不愛之民物斯言也人盡宜勉而所繫於為人君者尤重然三語之中又惟以祖宗之心爲心居其要焉蓋以祖宗之心爲心則必思開創之維艱知守成之不易兢兢業業畏天愛人於是刑兄弟而御家邦斯以父母之心爲心也民同胞而物吾與

斯以天地之心為心也孔子曰明乎郊社之禮禘嘗之義治國其如示諸掌乎宗廟禘嘗之典固先王繼志述事之大經也然自聖人象大過肇封樹以來上陵之制漢代已然我國家肇興盛京邠岐之地橋山在焉昔

皇祖六十一年之間三謁

丹陵用展孝敬

皇考在位百度維新日不暇給適西鄙有事徵役已勞

又

藩邸時曾奉

皇祖命往謁

祖陵是以十有三年中未舉是典予小子續承丕基懼  
德弗嗣深惟

祖宗締構之勤日有孜孜敬奉神器言念盛京為天作  
之基

永陵

福陵

昭陵巍然在望不躬親祀事其奚以攄懃忱而示來許  
爰以乾隆癸亥秋恭奉

皇太后發軔京師屆我陪都孝思以申

祖武是仰因周覽山川之渾厚民物之樸淳穀土之沃  
肥百昌之繁庶洵乎天府之國興王之會也昔幽居  
相度召頌公劉岐宅作屏周歌太王莫不於

上帝之監觀下民之君宗三致意焉故物以賦顯事以

頌宣既見於斯豈默於言乎遂作賦曰

歲大淵獻時旦柳中協律無射辨方庚辛歷吉日以建  
旗駕應龍之籒鸞紛瀛庠蕤蛇蜒旌雄虹撞鳴鳶周乎  
神臯之壤屆乎箕尾之躔循我留都殺裡

珠丘懷精氣仰

德流既備既申迺御黼座而覲臣寮維締造之彌艱撫  
草創之鴻圖曰於休哉是蓋突載亮之子殷躡宅鎬之  
姬周憑虛致譏於東約安處薦諂於西踰下此離為十



二之國合為六七之侯鼎立瓜分者益瑣纖旁魄不足以殫據而孟堅平子太冲者倫方且豔陳峻函隴坻之隘鹽池墨井之腴粉詣天梁之麗三條五劇之區極鋪張以詭辨彼何辭廼稱諸奚佯夫天作之皇宅又何藉長弘與魏舒於是諮文獻考圖冊不慝不文爰賦其略聚精構思挂一漏百粵我清初肇長白山扶輿所鍾不顯不靈周八十里潭曰闔門鴨綠混同愛濤三江出焉帝女天妹朱果是吞爰生

聖子

帝用錫以姓曰覺羅而徽其稱曰愛新是剪是除匪安  
匪康乃有葉赫輝發界藩撫順遂築城於遼陽以為東  
國之宗

天篤其祜載恢厥功天命十年相險宅中謂瀋陽為王  
氣所聚乃建盛京而俯闕西故言其封域則雖始自秦  
漢歷隋唐以迄遼金歟而舉其規模則維新

皇運膺靈佑之獨深也仰符十度之尾實臨析木之津

得雲漢之所垂維北極之所鄰亦何異乎召伯相宅卜  
惟洛食奉春建策留侯演成哉於是乎左挾朝鮮右據  
山海北屏白山南帶遼水滄溟為池澎湃澍濃流湯湯  
赴瀾瀾撇澆洶迴渾漾浴日沃星莫測其始東盡使犬  
之部朔連牧羊之鄙啟我漠惠之原擴我俄朶之址高  
燥埤涇原田每每走大野而拱太室者萬有餘里其山  
則鐵嶺繡嶺平頂降龍木查石門東水南雙矗岵嶴聚  
葱麥嶺兮劣削嵌兮頃峒削兮龐嶂律兮塘翁蔽虧日

月源流湖江旣孕奇而盤鬱亦含秀而隆崇故夫四蹄  
雙羽之族長林豐草之衆無不博產乎其中蹄類則虎  
豹熊羆野馬野驃鹿麋麕狼豺封駝狐狸獾貉跳兔  
娑娑鼪鼯艾虎貂鼠輕嘉其他牛馬羊豕之資以日用  
者蓋填閭巷而烝寢訛羽類則野雞沙雞鶩鴨青鷗鶴  
鶴禿鶩維鷦在梁縮脖鳩燕啄木鵲鶻鷹鷂鷓鴣紅牙  
商倉黃鶴鼠化白鴈霜橫曰海東青出黑龍江林擊則  
天鵝禡魄旬搏則窟兔走僵其他鴿雀銅嘴桃蟲鴛鴦

雜沓紛泊騰軼翱翔其草則蒿艾香蒲蘆葦蕭荻章茅  
水葱紅藍綬鷓鴣馬蘭知時木槿紀節厥惟人後三桮五  
葉氣稟地靈功符陰騭商陸茵陳篇蓄葶蘼蠶實兔絲  
均能已疾其林則五針之松萬年之栢重障隱天幽林  
蔽澤挺崇槐之曾青蔭柅柳之濃碧大椿以八千為春  
壽櫟以不材為德爛紅杏與緋桃紛白棟與黃蘗山藤  
柔韌是資鞭策雞桑落黃可供蠶織陸珍既叔海錯亦  
繁鯉魴鱒鰕鰾鯽鯽鰣鯪鯢鯢鯢鯢鯢鯢鯢鯢鯢鯢

重唇浮湛劍飾鮫翅柳炙細鱗牛魚之長丈計帶魚之  
白韋編烏鰂之鬚粘石渡父之喙矻船他如蛇馬驢狗  
豚獺豹獾出沒乎洶涌潛躍乎游淵蒼龍捷鬚而雲作  
赤螭掉尾而波開老蚌含珠九光燭天神奇是韞瓊瑰  
是生雖山經與地志羌莫得而詳焉懿茲奧區原隰昀  
昀厥田上中厥壤惟平抱海負蓋跨遼欲宣渾河為帶  
興京為襟袞複陸而坦坦橫拓落而芸芸偉嘉禎之萃  
蒼信橐籥之網緼

帝眷東顧用畀

皇清而為萬載之沛豐若其測圭臬度廣輪依繩尺疏渠  
川歌經始詠攸寧又可略聞矣

天命天聰丕顯丕繼因其舊藩拓我新制規天矩地嚮明授  
時增八門之詆蕩脅九達之邇迤翼翼俾倪宕宕堞雉起  
圜丘於郊南單墀垣之潔祕欽柴颺禋陳玉薦幣鼓雲  
和升繭栗以邀盱蟹而昭祀事霜露在履春秋聿遷愾  
乎優乎聲禋閼宮滌濯毛魚玄酒太羹

文祖

神宗爰歆於斯符帝車之太乙正王宮於未央重三殿  
之實枚表雙闕於闔閭闕名維何文德武功殿名維何  
崇政建中高樓望氛厥題鳳凰後宮紫極交泰清寧闕  
睢麟趾化洽家邦維樸而安乃鞏而臧豈其工櫬檻之  
刻鏤豈其飾棖橈之焜煌豈其疏龍首之裊葉豈其叛  
鳳翼之昂藏匪有心於儉約乃潛揆夫陶唐大政當陽  
十亭雁行爰諏爰度日贊日襄吉君臣之一德而擴我



闡於八荒正號紀元以受天慶於是定兩翼之位列八旗之方黃白紅藍有正有鑲法其象於河鼓則其數於羲經神其變於三五握其竒於九宮

大聖創制動協天象是猶易之書契乃觀蹄迹焉樹以屏翰馭輕居重本支百世昌我宗潢佐命之勲曰費英東額都希福績茂蕭張曰有坐謀曰有折衝旣彬彬而濟濟亦赳赳而彭彭其餘附鳳而攀龍者蓋車載與斗量爰制國書聿興文教演義譯音物取其肖允維大海

克稱檢校雖絕域其必通即織故其亦貌若夫人自為  
戰王者無敵角嚴則百壙失憑旌揮則三邊定檄義不  
返顧勇不重壁是以救四海而莫櫻亘千古而鮮匹故  
班錄於累世用以酬夫勞績及其斗杓北指涉冬背秋  
爰狩中原我戎是修靡虹采裊蜺旂拖霧縠建雲旂後  
屬車前導游乘我良產屏彼彫輶右忘歸之箭勁左繁  
弱之弓柔倩湔而雷動鴻網而星流又何必王良執轡  
織阿御輶也哉於是帶甲之士百萬盡發鷹犬而驟驂

騶卑泰山之為櫓跨渤海以張梁林林裔裔列列裒裒  
命地而後中應聲而先掄散壅廩之羣友剔穴狸之伏  
留駭巖廩之儻俟驚郊兔之佻偷既肩情指倦而虞虞  
之羣猶緣陵蔽野比夏草之稠焉爰用三驅示無盡劉  
更命羽林欣飛之士手豹尾踞虎頭博洞熊殲澤纓觀  
壯夫之鶴躍快猛獸之貙虜乃獻我成禽舍彼踐毛擇  
其上殺允惟左膘以奉宗廟乾豆亨炮次充賓客乃薦  
君庖班獲行賞訖乎輿僚是蓋因天地之利習軍旅之

勞戰則克而祭受福古者蒐苗獮狩之禮所為昭詎其  
害三時之土穀奪百姓之腴膏蹂桑柘之地廣虞獵之  
郊如子虛上林之所嘲也哉將將蕃后夔夔列君奉贄  
來朝齋遯侍宸或稽首而請聘或傾心而納姻於是樂  
以九奏饗以八珍邁呼韓之朝天踰頡利之舞庭合內  
外為一家自我

祖而已然垌牧之宜曰大凌河亘肥壤之博衍茁靈草  
之敷披夏蚊避境春泉漾波是以駟駟之牡蕃孳孔多

爾其驪驕騅駢騏駼驪駟駟駟或眠而  
馳或行而馳惟致遠之有賴亦揚威之無過畿甸旣闢  
農桑是咨爰飭田畯爰勵甸師物早晚之種辨高下之  
宜男則耕耘是務女則織紝是謀抑工賈之末業勤衣  
食之本圖故深耕易耨穀用滋也九夏三耘免汙萊也  
雨我公田遂及私也庠我錢鏹銍艾時也我簋斯盛實  
佳粢也我倉如陵庾如坻也服尚布棉奚纖美也器用  
陶匏戒奢靡也土物是愛神降嘉生黍維秬秠稻維糯

杭粟維糜芑梁維赤黃解蠹胡麻來牟鈴鐺蘇分紫赤  
豆有豌豇蔬則雲臺薤蒜蘿蔔韭蔥萋蒿蒲筍紫堇茴  
香壺盧蔓菁蒿苳葵彊鮮不旆旆稷稷嗉嗉幪幪驛驛  
厭厭繇繇穰穰惟脈土之獨純斯穡事之孔良農隙教  
戰守禦相望國以殷富兵以盛彊鬱葱佳氣盤礴無垠  
民風噩噩伋伋自然休有

烈光格于

皇天

上帝其子之維有歷年是以我

世祖因人心之歸清順天意之厭明掃驅除之閏位統  
子弟之精兵無亡矢遺鏃之費而膺圖正位乎燕京蓋  
嘗考千古之興替稽百代之運數拒符瑞之難諶信仁  
義之堪守斥逐鹿之蠱說審神器之有授乃知

帝命不時眷清孔厚也不有開之何以培之不有作之  
何以得之夫其披荆棘冒氛靈歷艱辛躬利害無嬖代  
之迹而受車書之來者蓋書所謂于湯有光詩所謂民

之攸歸矣皇矣陪都實惟帝鄉乃命秉鉞之帥乃置五  
部之卿民安郡縣旗樂屯莊春秋耕斂我倉我箱朝會  
朔望躋躋踴踴昭萬年之有道卜百世之靈長乃作頌  
曰

於鑠盛京維藩之陽大山廣川作觀萬方虎踞龍蟠紫  
縣浩穰爰浚周池爰築長墉法天則地陽耀陰藏貨別  
隧分旗亭五重神基崇峻帝系繇昌周曰邠岐漢惟豐  
沛白水慶善興王之會長白隆隆滄溟滅滅形勝之選



奕世永賴俯臨區夏襟控中外休養百年既豐而泰溯  
其始謀繼序敢憚昔我

聖祖三至斯土琴麗六飛森沉萬旅孔碩九重不遑安  
處祇謁

山陵亦臨朝宁置酒故宮用酬父老乃霈恩施逮乎編  
戶匪勤於巡良慕乎古閔予弗德實纘丕基歲時  
太廟陟降格思緬仰

鼎湖惟瞻惟依荷

天之龍際時之和駕言徂東絡繹羽儀風舉雲搖鱗萃  
魚麗我賓我臣我行是隨載至神鄉載覲


園寢靈鬱崇輝祥凝巨瀋原廟衣冠霸陵衾枕松柏雲  
縵溪池流淦盪滌洪爐陶甄羣品石馬悲風淚泉沾衽  
豈必羹牆一氣是稟聿造故宮故宮赫赫聿升太階太  
階奕奕無彩之飾惟厚之積皜曜醜照歛艷烏赤左城  
右平坤闔乾闢土壁葛燈遐哉儉德詒我孫謀萬年之  
宅乃開南端設席肆筵爰爵周親及彼鴛鴦南陽故舊

洒如言言惟此嘉師

列祖之臣是噢是咻是貽我躬敬之敬之翼翼惴惴於  
億萬歲皇圖永綿



皇清文頴卷首十八



總校官庶吉士

臣

張能照

校對官修撰

臣

張書勲

膳錄監生

臣

繆謨

欽定四庫全書薈要

集部

皇清文穎卷首

十九  
二十

詳校官候選知縣臣吳甸華



欽定四庫全書薈要卷一萬九千三百九十六

集部

皇清文頴卷首十九

御製詩

樂府

倣雲漢詩體敬製雩祭樂章以申誠懇八章

瞻彼朱鳥爰居實沉協紀辨律羽蟲徵音萬物芸生有  
壬有林有事南郊陟降維欽瞻仰

昊天生物為心一章

維國有本匪民伊何維民有天匪食則那螻蟻鳴矣平

秩南訛我祀敢後我樂維和鼉鼓淵淵童舞娑娑

二章

自古在昔春郊夏雩曰惟龍見田燭朝趨盛禮既陳神

留以愉雷師闐闐飛廉衙衙曰時雨暘利我新畬

三章

於穆

穹宇在郊之南對越嚴恭

上帝是臨繭粟量幣用將悃忱惴惴我躬肅肅我心六

事自責仰彼桑林

四章

權輿粒食實維后稷百王承之永奠邦極惟予小子臨

民無德敢懈祈年潔衷翼翼命彼秩宗古禮是式

五章

古禮是式值茲吉辰玉磬金鐘大羹維醇元衣八列舞

羽繽紛既侑

上帝亦右從神尚鑒我衷錫我康年

六章

惟

天可感曰惟誠格惟農可稔曰惟力作恃

天愍人弗刈弗穫尚勤農哉服田孔樂咨爾保介庥乃



錢鏐七章

我禮既畢我誠已將風馬電車旋駕九閭山川出雲為霖澤滂雨公及私興鋤利甦億萬斯年農夫之慶

八章

乾隆八年秋朕奉

皇太后恭謁

祖陵還至盛京受朝錫宴夫漢高過沛而歌大風情至

斯動直已陳德況予小子覲揚

先烈能無言之不足而長言之哉爰作世德舞辭十章

章八句

粵昔造清匪人伊

天天女降思長白闥門叶是生我

祖我弗敢名叶廼繼廼承逮我玄孫叶一章

玄孫累葉維

祖之思我西云來我心東依歷茲故土仰溯始謀叶皇

澗過澗締此丕基二章

於赫

太祖肇命興京哈達輝發數渝厥盟如龍田見有虎風  
生戎甲十三王業以興 三章

爰度爰遷拓此瀋陽方城周池太室明堂不寧不靈匪  
居匪康事異放桀何心底商 四章

丕承

太宗允揚前烈倬彼松山明戈耀雪以寡敵衆杵漂流  
血惜無故老為余詳說 五章

余來故邦瞻仰

橋山慰我追思夢寐之間  
宗政清寧載啟南軒華而不  
侈鞏哉孔安

六章

維我

祖宗欽

天敬

神執豕酌匏咸秩無文帷  
帟再張樽俎重陳弗渝弗  
替

遵我

先民

七章

先民宅茲載色載笑今我來思

聖日俯照爵我周親蓋臣並召亦有嘉賓歡言同樂

叶

八章

懿茲東土允惟天府土厚水深周原膺膺南陽父老於

是道古有登其歌有升其舞

九章

我歌既奏我舞亦陳故家遺俗曷敢弗因渾灝淳休被

于無垠勿替引之告我後人

十章

雉將雛

行行麥壠邊見一雉將雛雛兒纔長成啞啞學母呼一

解翅軟未解飛嘴嫩未能食飲啄與遊翔皆賴顧復力

二解兒兮依其母母兮愛其兒一朝羽翼全那料南北

飛三解有童持長竿捕雛何遽遽老雉雖善飛繞匝不

忍去四解雛兒頗有智藏伏荆棘間棘密難採取頑童

悵空還五解湏臾童去遠老雉還來視母子得全活鼓

翼心倍喜六解爾童一何忍爾雉一何慈孰謂天良心

人禽乃倒之七解觀物可會心撫古常自鏡今朝忽見

此大愧中年令八解

夜夜曲

明月照我室清風拂我牀我思在何所伊人水一方清  
風拂我牀明月照我室肯尋長夜歡支枕誦無逸無逸  
支枕誦展轉念民依孰饑兮缺食孰寒兮鮮衣饑寒切  
中人何事不可有頽風日以滋吁嗟誰之咎

君子有所思行六章

君子有所思所思悠且遐叶休哉渾噩風軒轅一夢餘

嗚呼斯世兮何日成華胥

君子有所思所思閭閻間耕九而餘三有備乃無患嗚呼斯民兮安得免饑寒

君子有所思所思久以長猗歟至治世殷序周有庠嗚呼斯道兮何以被黎甿

叶

君子有所思所思怒未已宛然水一方蒹葭徒采采嗚呼斯人兮孰共緇衣美

君子有所思所思秋復春望道而未見簡編良具陳嗚



呼斯後兮何以淑其身

君子有所思所思切衷獨義經居玩辭曰无往不復鳴  
呼斯義兮保泰責誰屬

四言古詩

冬至有事於

南郊敬成八章章八句

於昭

天鑒眷於有德佑我

太祖東土是式

帝命不顯皇清不靈明德惟馨以昇萬邦

其一

赫赫

太祖

天篤其祜穆穆

太宗丕顯丕承駿德光昭爰受鴻名建國紀元肇定大

清

其二

暨我

世祖混一區夏

聖祖紹之容民厚下民安於耕物適於野六十一年惟

天降嘏

其三

皇考翼翼思為君難立綱陳紀祇承克艱授位渺躬受

命自

天敬念紹庭敢忘寅虔

其四

日惟長至爰卜

南郊三齋五戒將事吉朝式瞻百辟玉佩金貂式虔爾

心無或逍遙

其五

爰升燔柴燔柴惟烈爰陳俎豆俎豆維潔惟予小子敬  
捧蒼璧明明

帝神尚其來格

其六

神之格思降福穰穰敢曰予小子誠通

昊蒼自我

祖宗受嘏惟純

景命縣縣逮我後人

其七

伐鼓淵淵建旆翩翩祀事用成福祿來駢匪以祭而專  
匪以燕而遷對越

昊天豈敢間兮乾乾

其八

萬竿煙雨

有猗者竹在彼渭川乃含宿雨乃帶朝煙其色維何非  
姁非妍其音維何非管非絃有客坐對羗民之先其屋  
何有四壁蕭然其手何持道德一編逸民也歟吾何得  
而致焉

五言古詩

古風四首

泰山不讓土河海不擇流為學亦如此取益在廣求見  
惡當自戒見善期自修三人有吾師近取乃日休

孟山何宮堯有獸曰騶虞賦性本仁慈舉趾惜薜蘿終  
為王者瑞見乃盛世符南山有猛虎食肉如食芻饒嗜飽  
腹腸何論有無辜一朝獵者至咄嗟喪其軀仁殘天道顯  
視此何所殊

郭公解布穀王孫能促織區區禽與蟲因時亦有識人  
生性本靈充然備五德私利一薰蒸靈臺因窒塞譬彼  
瑤臺月忽被蟾蜍蝕克己萬理明處事乃不惑

春風二三月花嶼爭芬芳出門踏青人車馬沸如狂芳甸  
布綺席繡陌遺琳瑯幽蘭在空谷詎肯生道旁地僻人莫  
賞誰識王者香我來採盈把歸植讀書堂同遊不同趣對  
爾聊徜徉

讀西山先生大學衍義

晴窓披典墳望古興遐想眷惟希元翁體道粹涵養著  
有行義書妙蘊資尋攸大含亦細入渟泓包萬象孔曾  
緒不墜千載揭昭朗讀書思其人高山欣景仰

冬夜偶作三首

天寒鴉歸早月上人語靜融融地爐煖紙窓散清影白  
日雖苦短迢遙愛夜永敲句和殘更惕然發深省

簾幙重重下獸炭旋旋然猶恐寒侵肌向火爭趨前懸  
知玉關外雪積層冰堅出征衆軍士皸瘃實可憐况當



歲云暮家室情更牽所恃雨露厚兼賴主帥賢凱旋應  
指日永不戍窮邊

梅月窓外橫漏滴響未了心閒吟思生境靜俗情掃每  
從物理中略識清心道撥火且烹茶一杯供軟飽

催耕鳥

條風天宇布百昌欣韶熙村原趣已佳綠水明千畦東  
耒耕南畝提壺餉東菑郭公何丁寧催耕田畔啼高樓  
嫩柳梢低喚柔柔枝分明為一言東作當及時田老聞

之喜胼胝非所辭田婦聞之喜饋饁職所司但願歲豐  
穰辛苦甘共之幾度聞此聲蚤起竭力為那似香閨中  
驚眠翻怪伊

相馬吟

知人固非易知己良獨難譬彼駕鹽車太行阻且屹惜  
哉騏驥良徒共駑駘餐一朝遇伯樂三鳴感多端秣甘  
飲清水飾之錦繡鞍西極崑崙墟東窮渤海湯追風四  
蹄輕飄飄如羽翰聊藉酬知音不顧汗血殫伯樂不世

出騏驎空自殘誰憐伏檻者執策一長嘆

灌麥

大麥五寸長小麥三寸半地乾苗欲枯離披墮畝畔猶  
幸灌溉便近傍河之岸清晨課僮僕輓轡轉雙腕初看  
土濕濕漸覺流漫漫頃臾苗盡起生意良可玩爾僕聽  
我言莫怨體流汗不見萬頃田農夫徧澆灌

讀范文正公神道碑用宋陳傅良原詠韻

入夏南風熏花木圍我廬我廬何所有挿架古人書希

文古大臣不與伊葛殊特達圭璋器心跡天日如今讀  
神道碑更識為名儒中庸賴公顯程朱繼其餘廟堂而  
江湖憂樂與民俱天章十條陳忠懇豈區區仁宗稱賢  
主郅理亦可期參政僅九月不及大有為徒令范老子  
聲名播荒陲

古風七首

堯舜傳心學危微十六字禹湯繼其傳執中與禮義文  
王躬疊疊不已功常粹唐虞三代初大道中天麗比屋

皆可封無煩別義利詩亡春秋作風薄俗亦偽惟時王  
道衰人人騁私智天生我仲尼金聲振洙泗刪詩定禮  
樂堯舜功不啻一自泰山頽彌天布妖彗楊墨逞邪說  
申韓建私議鄒嶧乃揚徽奮然闢險詖戰國逮嬴秦道  
蝕斯文墜祖龍輕狂兒輒敢燔典志劉季提三尺儒風  
豈云熾武帝始求賢董子明正誼三策醇乎醇天人理  
咸備昌黎稱聞道猶未濟其哉自漢迄宋初道昏人如  
醉偉哉無極翁粹然秉道氣學不由師傳理已臻極致

二程實見知主敬標赤幟朱子集其成經天復行地緬  
維千載心授受本同契絕續遞相行斯文統緒寄午運  
數恰中自協唐虞治作君兼作師吉士踵相繼

巢由避堯舜遯世心自安嚴光繼其蹤隱釣富春灘光  
武曲成之高節難躋攀東漢尚名義廉立懦與頑奸雄  
且顧忌千古一釣竿

中天秋月皎四野秋風生庭梧一葉落陰蟲相和鳴鴻  
鴈橫遠塞音響一何清蟬嘒忽已寂又催刀尺聲物理

皆如此隨時有枯榮

東海有瀛洲仙人居其間安期羨門子九轉成金丹自  
謂得長生飛昇如羽翰倫物苟遺棄孤生亦何歡

瀟溪惟愛蓮淵明惟愛菊吾於羣卉中特愛渭川竹嚴  
冬草木枯依然挺青綠扶疎繞屋栽朔風鳴寒玉直哉  
君子節所守貞且篤

秦王失其鹿英雄爭逐之沛公入關中三章法令施偉  
哉蕭相國策力咸會時鴻門宴諸侯端坐衮冕垂一增

不能用勇力徒爾為矧廼恣殘暴衆志均乖離用賢兼  
愛民斯為王道基

淵明既歸田門前種五柳心與世俗隔讀書快飲酒惟  
結山水緣那復戀五斗微意殊可風亮節不掛口

過曲澗花香遊流杯亭日知閣諸勝

西苑曠且奧肇自明代作瓊華萬玉堆太液千夫鑿平  
地起蓬瀛城市而林壑松篁幾百年參天秀嵯萼秋深  
鴻雁鳴春暖桃李灼世廟求神仙林亭更開拓方士朝



扶鸞虛皇夜飛鶴丞相冠蓮花將軍赤符縛雞犬倏已  
昇殿宇還如昨

盛朝建邦畿舊制因城郭何獨廢西苑姑亦存其略高  
居非昔比偶幸行宮若雍正二年夏承恩開講幕避暑  
供游息勝迹頻探索湛湛芳草青潏潏遊魚躍蔥蔥梧  
桐枝爛爛蓮花萼或宴水雲榭佳景開芳酌或賦迎熏  
亭妙句隨興落師友得從容昆弟善笑謔是秋獵塞北  
奇峯峭天削回思此間山宛似日出爍因緣不復至撫

景懷佳約時過玉螭橋波光含漠漠烟際辨樓臺松竹  
紛竿簫彈指十年間何異風鳴鐸前日重來遊未能窮  
其樂遙矚淑清苑凍岸不可泊今朝好風景遲日中天  
爚步自瀛臺橋踏冰行蹻蹻乾蘆尋曲徑虛殿開金鑰  
穿雲洞戶深步石川梁迤乃知洞裏天自與尋常各冬  
深景寂寞翠剝琅玕籜閒坐流杯亭更登日知閣會心  
濠濮間呼朋嗒然噓其北乃假山巉巖何磊砢攀援徑  
絕處深澗戲騰蹕時我徑過之我童猶畏却其上掛瀑

布結構儼廬霍飛沫雜水流玉牙排斷喙其池乃不凍  
疑有馮夷托當年觀魚亭塵土生珠箔歸鞍適然返聊  
爾何住着我聞山水緣好者不為惡何必買山錢底須  
蠟芒屨前居水中萍茲遊林裏雀異日得清暇還教度  
略約

海子外行圍

朝霧歛秋空遙天白如水獵騎出郭門寒郊行邐迤箭  
逐雙鵬飛鷹伺羣雉起相逢倚杖翁農話斜陽裏悠揚

墟里煙淡掛疎林紫歸鞍拂晚風獵罷心猶喜

茅檐曉曝

烏啼霜月落朝旭纔三竿寂寂寒村景參差入遐觀茅  
檐晴趣佳野老方負暄那知嚴風淒但覺愛日溫是時  
罷三農繞膝圍童孫快哉黃棉襖普被無卑尊熙熙太  
和世大哉天地恩至樂矜新得擬欲獻金門

冬夜偶作四首

風簾送竹音月窻散梅影稍喜萬幾暇敲句寒更永棲

鴉寂不鳴漏滴銀壺靜遙想謀利人夜半喧市井設非  
為衣食肯冒清霜冷饑溺聖人心撫躬常三省

曩吾詩興豪即景抒清思非云誇別裁藉以道己意茲  
偶拂吟牋捉筆聊且置豈嫌推敲苦為恐雜心志吾志  
在何所望道猶慚未曾聞聖賢語躬行實匪易

盆卉吐芳葩氣轉陽和新匝屏風開嶙峋獸炭焚縷  
縷篆文斜一室藹如春却憶閭閻間比戶窶且貧龍堆  
雖罷戰尚有長成人譬彼嬰兒啼父母寧忍聞念此展

轉愁丙夜憂思頻

昔愛冬夜長隨意消清福今苦冬日短剪繁批奏牘稍  
暇兀然坐詩興亦局速豈無玩好資足娛耳與目開編  
對聖賢祇覺增慙慙

暮春圓明園即景二首

夜來膏雨足曉起倚前楹芳園景已佳百卉爭鮮榮迷  
離柳絲重間關鳥和鳴遠峯螺髻翠新漲鏡面平依依  
陌上花向人如有情維我值幾暇裁詩聊品評品評何

所樂所樂足春耕

心閒境自幽樹老園更古况復近西山雲氣時吞吐結  
茅為屋宇欲識農家苦俯仰覺安和何必誇瑤圃

時巡近郊見西成有象喜而賦此

緬懷春之暮彼蒼有旱意憂心慙如焚中夜望天賜賑  
恤發太倉綢繆無不備賦彼雲漢詩展轉詎能寐好生  
天之心一雨蘇萬類苗者日以秀秀者日以穗時巡屆  
初冬夙駕催六轡眄茲場圃間頗覺倉箱積千畝幸有

獲二鬴猶未遂稍足慰吾心尚未愜吾志吾志伊如何  
教養非二事即今比戶間豈盡知孝義披褐者農子前  
驅莫訶避疾苦當諮詢痼瘵予增愧汝饑誰之由汝寒  
吾所致賙賜出泉府旬宣屬官吏猶恐億兆民未盡沾  
實惠際此薄有收聊可酬望歲寄語為政者豐年實為  
瑞

初晴晚照

落景掛平林初晴景倍好霞連天際山風動枝頭鳥閒



心遊物外逸興託雲表茲焉足自適何必尋蓬島

十一月初七日得雪時大雪節也喜而有作

小雪雪霏霏

小雪節亦有雪

大雪霏霏雪今年三白早喜復應

時節朝來眄庭除皚皚堆玉屑上林冬欲半滿樹瓊英  
纈曩余饒逸興玩賞吟清絕值此六出飛豈不中心悅  
所樂在田疇望歲念彌切裁詩為誌慶那更論工拙

華嚴洞勒壁

別院駐鑾輿瞻禮招提境清曉趁風涼捫蘿登絕頂嵌

石老松蒼滴乳寒湫淨初上若無路漸入多佳景豁然  
雲木開古寺橫山嶺石龕月相閒簷鐸風聲靜朱欄俯  
帝畿烟火富閭井旋憇華嚴洞颯然衣袂冷深窺潛竇  
黑微聽幽泉洄何須一指叅自覺萬慮屏

飼魚

臨流坐石磯忘機魚不避投餌試飼之引類紛然至却  
知非釣竿在藻心無忌清漣漾鏡光一一堪數計因之  
識魚樂長歌發幽思遐想天地間人物理不二有心鷗

乃去去實人所致吁嗟庸衆流勞勞為名利有時喪其  
良反不如魚智若令貪釣鉤早作盤中味

每有吟詠輒以示大學士並南書房翰林等或命  
依韻迭和非以辭藻相誇尚幾暇之餘相與優  
游翰墨亦可以陶性情驗政事比之徵歌選舞  
不猶愈乎因書以示之

宣尼曾有訓羣居不及義況在君臣間尤貴同茲志譬  
彼舟楫具大川方堪濟彼民有隱情孰為達其意或政

有偏頗孰為防其弊三百一言蔽曰惟無邪思可知詩  
教正其葩乃餘事惟予忝民上奉三而出治所愧理未  
純因之政多戾皤皤二三臣咸具經邦智濟濟翰苑英  
亦有責難誼因言匡不逮所益良匪細若徒獻頌詞恐  
滋後來議

觀穫

白露湛郊原西成候已至綠野滿黃雲紫莖垂絳穗銍  
艾茲其時錢鏹良具庠幾餘臨別院農務觀次第值此

歲云稔實感天所賜念予恤民艱常凜祈年意積以三  
時憂今朝乃大慰

讀杜子美集有感

男子妬名祿女子妬顏色古今坐此病幾喪人家國不  
惟庸衆流英才每被惑卓哉少陵翁獨能秉謙德當時  
言詩者非甫則云白觀其寄李詩自謂如不及其實菽  
粟言何用誇奇特茲人嗟已往誰得其正脈獨嘉不伐  
心永言以為式

心遠閣秋眺示大學士及南書房翰林等

一指當人前不見泰山高離婁閉目時詎可察秋毫至  
人用心鏡萬物不能逃王者明四目智燭良獨操茲閣  
名心遠寓意豈在遙結構山之巔俯仰近雲霄況值三  
秋深天氣高沈寥葉落萬林疎憑眺心神超伊余有遠  
思匪戀物華撩或情有壅蔽或民嗟苦勞或賢當登進  
轉令在下僚或時雖小安遽益志氣驕見理有不周愆  
尤自此招辨言有未當是非致混淆心遠之謂何豈謂

盼荒郊即事因自做此樂非遊教

昔聞

昔聞盤山側有谷名虎里白額任縱橫居民皆遠徙有  
一雲水僧結菴山之岨夜坐悟無生曉起擔柴水忽然  
一虎至是僧瞋目視孽畜胡為來速去斯可矣虎果掉  
尾去如聽彼指使自此衆鄉民號之為佛子僧亦自謂  
神其實無他技無何虎復來咤之厲且訾逐逐行近前  
僧憊乃拜跪四隣爭赴救虎去僧早死方知浪得名前

番幸偶爾有名無實人可以鑒諸此

寒雀

驅車淅水道野曠風蕭蕭日出嵐霧歛村木森寒條凍  
雀三五羣依依棲霜朝晚穗收穫盡饑寒苦無聊唧唧  
如鳴悲春陽愁正遙野鶴翔高空清唳響雲韶霜翎耐  
嚴冬稻梁不可招或時斂翮下千尺長松梢俯視衆寒  
雀嗟哉爾徒勞

夜靜觀書



看書如看山其境日日殊隨境不會心多聞不如無況  
乎辨治亂因以別賢愚豈徒誇英華言行須同符念予  
志學時所慕君子儒詩亦尊李杜文亦宗韓蘇要歸踐  
履實聖言非我誣即今持治柄豈不慕唐虞措行始知  
艱慮為空言徒裁詩銘座右庶幾日警吾

春日載陽土膏滋潤努力東作正宜其時既命各  
省督撫勤宣朕意其有籽種不足者量借予之  
又成此詩以示重農務本之意

去年冬雪少塵懷殊未置入春稍釋憂霑足叨天賜更  
喜遠近同優渥遍大地東作此其時可不盡人事因命  
岳牧臣共勗勤宣意督耕策其惰借種施以惠惟此重  
農心匪慕驩虞治

讀朱子全書

少時慕才華研精味辭藻微言探月窟逸興橫雲表措  
思每廢餐兀兀忘昏曉雖云俗慮無却被詩魔擾至理  
在目前棄而求深窈曠蕩無所歸悵悵盈懷抱近讀文

公書習氣從茲掃因知九仞山一簣功不少作此聊自  
訟詎足云見道

書法中最喜黃庭堅筆意因而有作

羲之稱書聖諸體無不有齊梁作者無李唐推顏柳惜  
哉世已遠膺者十之九宋元差可尋翰墨出親手幾暇  
戒宴安時或遊藝數就中名蹟夥惟愛魯直叟倜儻無  
安排瀟灑絕塵垢譬如百尺松孤高少羣偶信筆一規  
摹運腕忘妍醜所師在神勁詎論形肖否伊余有深意

筆諫曾謹守好尚苟不端喪德良已厚所愛汲黯薏栽  
詩銘座右

燈

騰輝照綺席散彩當珠殿馥馥博山香遲遲玉漏箭影  
射桃笙流華映蝦鬚絢九枝非所貴分陰誠可羨方勵  
焚膏志敢卜通宵宴剪繁閱奏章毋使目光眩

南天門觀音寺遙望

古刹禮大士虛堂息勞身旋起憑欄望舊徑還如新谷

轉見行騎山高截片雲是時秋始孟綠樹猶繁紛兩山  
闢仙境一路無纖塵裊裊旌旆影隱見出嶙峋逸興一  
以暢轉益憂懷頻念彼隨從者跋涉良苦辛

塞上秋景

盧龍風日寒况復臨素節芸黃帶露稀峯翠經霜潔宇  
空雲影淡流冷泉聲咽夙志慕高深對此聊怡悅

皇清文穎卷首十九

欽定四庫全書會要卷一萬九千三百九十七

集部

皇清文頴卷首二十

御製詩

五言古詩

古風三首

建極撫五辰執中御八埏望道而未由朝夕增惕乾曩  
余佩古訓治理頗能言行之扞格多乃悟實踐難克已  
苟未至其失已大焉如木斯有本如水斯有源源本或

有乖設施亦徒然觸目堪警心小子其慎旃

重華協帝治闢門延英俊如茅斯拔如賢才乃奮迅其  
源苟不清所用安可信求者為虛聲應者為干進譬珠  
在深淵魚目難容混譬玉在完璞瑕瑜慎所遴履信而  
尚賢庶乎天助順

天道有循環培栽而覆傾人道有損益好謙而惡盈君  
子審厥幾處夷乃若驚況乎持大寶驕滿毋或生人君  
惟一心干者萬計迎紀綱苟稍紊調劑安可憑憂其所

可恃懼其所可矜善醫善計者其道良足稱

路旁

路旁一野老呻吟一何苦鳩面步履艱單衣百衲補試  
問何方人云籍隸齊魯猶憶少年時逃荒離故土傭佃  
聊度歲又復病雙股問翁業何有囊無一粒黍問翁室  
何有妻沒絕男女孺只此身知死何處所我聞淒然  
悲所悲非野父曾記周詩云君子民父母教養違其方  
黎民失恃怙命醫施鍼砭或可離痛楚白金賙其窘屋



居免露處固知煦嫗仁所愧澤未溥

鳩

小軒夏云半嘉蔭誠清絕疎簾隔塵囂翠簾含冰雪何  
來鳴鳩聲得得出林樾拂雨過春時喚霖當夏月物各  
有天性人自生分別何喜噪簷鵲何愁杜鵑血何勞布  
穀催何悲烏夜咽而我聞鳩鳴亦復怡然悅卜雨愜我  
情稍解中心結

曉起

曉起憑軒楹林泉供靜怡假山凝宿潤新花濯故枝洒  
然衣袂涼九夏如秋時俯仰足適興何必登宗臺叶是  
時甘雨足膏澤遍草萊叶念彼隴畝間新秧正含滋撫  
景塵重農豈以恣遊嬉恭已奉三無澄心待萬幾

學字

長夏清且閒朝回憇池館蕙風拂桃笙鵝溪揮玉管淡  
淡墨池雲疊疊來禽版義獻去已遙顏柳真蹟罕追摹  
消永晝徘徊作清伴學敬語堪味筆正規尤善

集晉陶淵明歸去來辭字即效其體

良辰春將及萬物欣得時吾生亦幾何  
遑遑欲安之巾車晨出遊去留不自期  
丘壑聊流憩琴書心獨怡壺觴羨有酒  
親戚相問遺扶老而携幼東疇命耘耔  
無心雲出岫知還鳥倦飛寄傲天宇內  
行樂復奚疑

秋日普覺寺

金颼颼華蓋露氣逗曉寒西山景色佳  
駕言茲遊盤羽騎度林樾和鑾駐禪關  
兩峰闢仙路其背衆嶺環蘭若

百年餘勝景非塵寰是時新秋霽黛色滌遠巒一川禾  
黍風西成誠可觀金吾莫喧呼恐妨僧坐禪屏營禮大  
士而無心可虔卧佛伸其足萬劫常安眠菩薩羣擁立  
垂垂寶髮鬕旋憇方丈幽敲火烹山泉泠泠來牖下流  
為清鏡瀾雜英紛砌旁鳳仙與雞冠塵心一以洒迴蹕  
傳林間比丘湯凝睇爭如上方閒

淮揚一帶連歲被水黎民阡危用遣高斌周學健  
前往賑恤兼求䟽濬之方瀕行詩以賜之

負宸奉三無垂衣御四陸殷殷何所念所念惟蒼黎祈  
年厯宵旰惟願晴雨時安得海宇間比戶足食衣百姓  
敦親睦農桑樂雍熙圓蓋蔭仁恩邇來無征輦若獲歲  
屢豐教化或可期乃者淮揚郡澤國古若斯年來多水  
災黎民困阻饑旬宣勅大吏補救賴有司瘡痍尚未起  
賑恤宜早施蠲租並截漕疏流兼護隄凡百區畫方實  
藉衆力為吾恩汝其布吾民汝之兒何以淪異漲化為  
杭稻畦何以拯蒼黔免彼溝壑危予憂爾其釋爾勞予

應知勉爾經綸策慰予饑渴思

兩廣總督慶復奏報廣西太平府地湧泉水灌溉  
田禾喜而有作

粵西火畬地尤厯時雨暘曾聞夏仲月旱魃稍為殃企  
望佳音報殷憂殊未央乃者荷天賜湧泉山之旁灌溉  
數千畝源遠流澤長潺潺敷廣野決決活新秧豐稔欣  
有兆大吏馳封章有年願率土况在魚稻鄉依稀寸楮  
間而聞餅糜香所樂在田疇非為誇嘉祥

石門驛

午過石門驛秋風吹廣陌廣陌正西成場圃地無隙與  
與帶穗禾青青盈壠麥最喜秋雨足綠野含渥澤老幼  
無菜色倉箱頗有積四顧生歡心青驄不須策路旁一  
農父倚杖愁默默宣伊憂喜殊其言鄙而得前年夏無  
收所種供蝨賊去歲薄有獲僅供半冬食今秋倍去歲  
銓刈殊費力租吏下鄉來款接完賦額吏去業主至逋  
欠坐求責吾農三時勞曾無一日適我聞淒然悲執政

無良畫井田與均田制頗垂簡冊行之時勢異得寸還  
失尺罔民焉可為恒產寃安則翁其善保軀展轉增嘆  
息

再題盤谷寺

盤谷無定名太行亦有之是處兩山環不知名者誰我  
來正清秋萬樹丹黃姿間以蒼厓松尤比春林竒石磴  
溜鳴泉峭崿雲四垂佳景面面殊圖畫行行披依山闢  
新徑掃苔看古碑塵心一以洒不覺歸轡遲



初冬北遠山村

亭臯淡寒林坂原餘殘菊山村學溪莊竹籬圍茅屋欲  
驗農功勤時寓幾餘目值此三冬初樂彼五穀熟雞犬  
靜埗扉稊穗堆困簾稍慰心中憂未釋眉間蹙維揚尚  
阻饑秋來漲淮瀆風冷棚居民幾多向隅哭雖覃賑濟  
恩豈能遍輦獨小稔何足侈緬懷增忤惡

讀薛文清讀書錄

孔孟既云沒邪說浸昌熾祖龍焚阮之吾道益失墜漢

唐千載間孰為傳道器宋氏正學明乃能闢邪詖周程  
與張朱前後緒相繼卓哉薛文清為學知取棄獨宗五  
子語可謂得大意茲讀讀書錄聿見平生志自云心所  
開取以相劄記如香象度河步步皆實地澹泊味有餘  
中庸行多愧所欽道聖賢文章乃餘事

春日泛卧遊書室

閒雲縷遠空新水漲中沚幾餘弄桂舟盎然風物美書  
室何必室汲古探幽旨時或眺西山卧遊足萬里魚知

春欲跳平聲鷗為人驚起青青柳眉絲  
媽媽桃孕蕊蓬牕

踈密樛條忽移電晷古人惜分陰固知良有以

移花

脈土滋春膏嘉種無不宜偶因省耕暇移花課花師  
園卉日以夥位置殊參差或芳隱岩下或醜露阿垂  
或以蘭蕙質荆棘乃蔽之隱者出諸藪蔽者植之達  
叢生醜露條斤斧稍剪治遵彼除莠訓詎為傷仁慈  
須臾各得所而吾心乃怡霏霏甘雨沾澹澹和風披  
不枉大造恩

對之有所思所思知花易人兮豈易知

玉卮謠

如脂白玉卮既琢復磨之成器擅工巧恢恢圓中規豈  
以盛醇醪眠花醉月飛擬以薦明水玩褻非所宜更笑  
博古家空爾什襲為永惟無當戒三復實我師

風

園林當首夏暖風日日吹拂雲似席卷飄絮如雪飛繁  
蕊將辭條摧殘胡疾為對之怒焉愁不為惜芳菲年來

春雨艱多賦雲漢詩去冬三白佳膏潤被郊畿滿擬二  
麥豐慰我三農飢亢旱雖未形待澤正此時先憂理則  
然後樂非所期

陰

釀澤雲布空收威風返壑氛氲暗林巒黯淡靜簾箔豐  
隆馳素馭金烏稍斂爚佇待靈雨零普蘇甫田涸憶昨  
三白積滿擬有秋樂春杪缺甘霖入夏驕陽熯縱遲五  
日期蘇東坡喜雨亭記云五日不雨則無麥望潤心如灼覽古企休徵泰

階調六幕連年憂旱滂信矣余德薄彷徨立階除翹首  
天衣脚

晴

閒雲歸遠峰高空淨如洗亭臯清且淑紗牖玲瓏啟憂  
心此稍釋暫覽風物美青青帶潤針馥馥含香蕊平林  
泛輕籟別渚漲新水湖山弄霽光靄靄吟望裏念子經  
旬愁茲喜良有以猶慮澤未普天恩詎宜恃吾民衣食  
謀巨任將誰委以此數年來樂日堪屈指披圖欽古哲

兢兢惜寸晷况昧康乂術遑敢懈敬止永言勵此心陟  
降監厥士

初遊香山作

西山衛帝都勝蹟由來久蘭若何紛夥永安斯為首

香山香

寺名也我來攬景概正值新晴後朏明發御園蚤食至巖

口為境清且幽苔磴篆蚪蚪遠睇見窳堵近却蔽林藪  
尋徑乃得入疑有山靈守豁然壺天開佳趣無不有掛  
一恐漏百為縮裁詩手林扃引清籟巉嵬抱復陟到山

息俗念窮探絕塵垢皈依禮法王如聞獅子吼旋啟來

青軒天藻瞻顏柳

來青軒有御筆普照乾坤

皇祖四字

俯望暢心神碧

浪翻千畝稍憇棲雲樓嵐煙羃紗牖但聞琴筑聲泠泠  
滴階右桃源與北山視此應覺醜徘徊不忍去耽靜亦  
物誘駕言返勤政治理商臧否從無香山詩非是相辜  
負騁遊吾未遑茲來亦其偶

讀書

時雨既霑足園林清且幽麥畦含潤佳藥欄生香稠三



農均豫悅而我稍解愁解愁夫何為惜此寸陰適檐楹  
垂珠箔枕簟涼如秋挿架富圖書義蘊供探搜汲古仰  
前哲孜孜不肯休矧予乃下學安敢弛厥修文武道在  
人德行速置郵斯民三代民胡日趨佻偷欲期教化行  
先裕衣食謀展轉成寢薪歲月不我留把卷發深省懼  
貽空言羞

西海泛舟因至玉泉山

輕雲鱗碧空蕩暄朝爽湊湖山靜且嘉草木含芳秀小

舳泛西海西峰如在園招提隱岩阿金彩樹間透沿流  
試尋探玉泉宛相就是時新雨後活活涌銀溜拖為綺  
縠紋激作珠玉漱猶疑天上雲飛自石邊竇山鳥何間  
關林陰亦濃茂郊圻一騁望綠疇如錯繡憂旱心稍釋  
此焉遣清晝

御門日方與大學士等慮及山東河南尚未得雨  
而山東報得雨之奏適至喜而有作

忝繼百王後俯臨三代民民天實予責詎以遠近分所

期赤寓內比戶利耕耘耕九而餘三庶免溝壑淪幅員  
既以廣大造安能均澤國正思暘山田猶望雲誠哉天  
地大不能無憾人緬想畿輔間待澍當杪春旱暵雖未  
形憂心已如熏旋得尺澤甘解予愁緒紛麥秋轉可望  
良苗爭懷新爽氣來軒除几席清無塵豈其慰目前忘  
彼齊與陳東郊需一犁午夜縈懷頻惟茲共時亮二三  
休休臣負扆洛綢繆肯惜司農緡忽接方伯章降康知  
自旻泰山雨崇朝汶泗波粼粼乃知得禾書誌喜良有

因誰無望蜀念展轉生戚欣尚慮鶉火墟此日膏有屯  
射

燕角勁而柔楚棘直且長值此萬幾暇學彼六藝良風  
日散清淑佳蔭含微涼虎賁三千人掄材盡鷹揚庶正  
依法設繁弱亦已張觀德誠在此為仁良可方伊余有  
會心圖治思興唐文皇譬脉理慄慄懷幾康三復凜載  
舟數載徒望洋

捕鱧鯪有懷

鯉鰻之名見於小雅魚麗鯉即俗所謂黑魚鰻即鮎  
魚蓋鱗屬中最賤且惡之種而捕之則甚難觸目興  
懷亦有所託云

濬沼植菱芡園以陂與塘澄流深且濶鱗屬恣潛藏在  
淵日以久美惡類繁昌一朝事搜捕欲去其莠稂惟此  
鯉鰻種如彼獸中狼君子所不食

見韓詩  
外傳

太液安可容

叶况食其比倫鯉鯽胥被戕獨恨頑惡流偏足趨避方  
網罟既難獲竿絲亦弗上

叶

有人謂余言魚居水中央

截源涸其波彼醜安逃亡依策試為之重施隄與防鱧  
鯁伏汙泥所陳鯿鯉魴是謂思去惡反為善類殃世事  
有如此對之增慨慷

熱

昔余究玄理心地足清涼朱明任歌蒸一室如禪房茲  
余厘民瘼視民恒如傷時維暑雨候怨咨豈能忘炎氣  
當亭午盾日方熾昌念彼壠畝間曝背正耘秧茅檐蠶  
事急經緯忙吳娘蘊隆非所憚勤劬實可臧豈無九重

居廣厦簾垂湘水盤與雪簟歛澹翻寒光展轉苦煩熱  
心在黔黎旁日夕思其艱怵惕不敢康安能物外遊逍  
遙學蒙莊

夏日遊香山二首

追暑思清涼暫憇招提境茂陰連窮岡迴風來複嶺松  
篁何瀟灑石泉弄澄冷妙高堂名真妙高几席幽且靜窓  
前老虬枝童童盤碧影塵念既云歇禪心亦以屏適然  
何依著付與閒雲領

重基占佳勝一覽富萬概雨後朝爽湊豁訝新染黛高  
樓俯碧川煙雲呈變態檐樹綠婆娑砌花紅瑣碎遊心  
竹素園匪慕湏彌芥支公價誠論白傅山今賣

懷柔縣行宮對月

當秋玉輪皎况將臨望夕高空無纖雲銀河寫修白而  
我因上陵王路此于役行宮隣古縣晚景歸吟撫轅門  
息葆吹蘭綺倚畫戟愛此清宵佳對彼涼蟾碧蒼松韻  
金籟徘徊泛瑤席秋英何盈盈啼蜚紛唧唧沈寥良足



欣襟懷增暢適誰復尋前題俯仰論今昔

臨白河

密雲古雄郡山川何壯哉白河襟其右圓流多洑洄野  
花夾岸紅中泓鏡影開是時秋漲過波聲猶喧颺豈能  
駕虹橋臨渡且徘徊因知投鞭言侈志禍之媒駢舟作  
輿梁橫陳榆柳材力作爾毋亟非為遊觀來

觀荷

我從御園來荷花半彫殘此地乃關外荷花正新鮮離

宮憇征轡鏡浦迴遊船鵲時出沒遠峰入清瀾香籟  
拂我旁霞錦輝我前俯朶如欲訴傾珠學涕洟仰花似  
開靨對客呈笑顏朔塞多嚴風花事應早闌是荷婀娜  
姿詎能全其天或云惜芳菲留與詩人觀或云開較遲  
夏仲方田田晚榮亦晚枯至理然乎然

聞近京一帶得雨喜而有作

行旅慮久霖跋涉沾塗泥南畝種麥人方望秋雨滋自  
我始于役二旬已有奇未遭滂沱苦率遇晴霽宜豈不

利輜重中心有所思思彼隴畝間來牟正其時亢暘土  
脈乾耰鋤將安施忽覽封章奏膏澤自天垂四郊一犁  
雨雨公還及私良農既不悞塞路仍如茲雨暘各適可  
孰非大造貽懸懸差已慰芃芃猶可期迴鑾歷綠疇應  
有喜農詩

夜雨

塞山能作雲峰頭幾縷布有滄始萋萋如絲肖霏霧數  
日苦塵壒喜此甘膏澍濕潤忽被野延綿乃入暮牧馬

聲漸息啼蛩乍如訴  
欹枕聽淅瀝曠懷良可賦  
丙夜漏點闌微見星河  
露明朝發征鞍清切秋煙路

對月思唐太宗遼城望月事即用其韻

隴得復望蜀徵去尚存碣  
誰能效舜階繽紛干羽綴  
今月猶古月千秋何盈缺  
壯志想當年萋萋烟草結  
情因寥宇寄光向疎林滅

冬夜閒吟

良夜漸添長斗杓亦旋北  
旌門笳吹奏大野人聲息  
歸

轡辭瀋陽乘輿指京國  
羶廬坐閒窻可愛新月色  
差無塵念縈微覺輕寒  
逼關山巡閱多歷歷皆  
堪憶揚鸞和鈴中玉律  
忽已易悠悠今古人趁  
此駒過隙百年詎云久  
寸陰實可惜際茲清宵  
佳况對寒蟾碧金鴨已  
結篆銀檠半折墜却似  
去冬夜梅香遞宣席所  
志嗟無成所學曾何得  
惟餘此初心時時自兢  
惕

再題澄海樓壁

我有一勺水瀉為東滄  
溟無今亦無古不減亦  
不盈臘

雪難為白秋旻差共青百川歸茹納習坎惟心亨却笑  
祖龍癡鞭石求蓬瀛誰能望天倪與汝共濯清

見耕者

揚鸞鳴和鈴芳郊經迤邐是時春將仲盎然風物美脈  
土既已滋于焉農舉趾烏犍耕曉煙桔槔轉新水携筐  
播嘉種曰糜芑秬秠祖畛侯主伯課業惟孫子有來思  
媚婦餉之用二簋停輿一問之所言良有以賦性質且  
芑難為韋帶士况彼勞青燈豈易拾金紫欲為工賈流

近利吾所恥所以四民中惟農良莫比土物誠可愛世  
世恒守此當春南畝蘇修我耒與耜惟祈雨暘若倉箱  
還可擬

御園親耕

皇考時屢行之當春舉趾茲惟其時率循舊章並勸良  
農觸景興懷點筆成什

姬周肇豳岐所勤維穡事愛土物心臧八百基由是  
言考三代旋開國非一致豈無仁民君務農姑且置我

朝得天下馬上塞旗幟創武守以文耕稼尤留意

皇祖繪為圖種穫編次第

皇考耕藉田歲歲禾雙穗謂是御園中朝暮便親視

叶

况匪司農掌毋庸旬人治近驗雨暘時遙為倉廩備小  
子承

遺教深懼德弗嗣民天念在茲敢懈肯播志時云暮春

初修我耒與耜

叶

穀種備青箱服犁曰黃牸既耕亦既

種時雨仰



天賜詎止勸良農子弟示勿替

心遠閣作

春穀未播種秋麥纔抽穎食乃民命關吾宜為祈請明  
神靡不宗况茲妥靈境何須玉帛陳一衷萬營屏未瞻  
膚寸合轉覺吹萬猛信矣誠未孚怒如憂益炳稍憇心  
遠閣遙望東南頃題句憶舊年綠雲正井井

春懷詩

漾潒南入江豈復西為漢朱輪墜桑榆詎返東而旦四

時均易逝三春更難絆九十忽云過青韶亦已晏落英  
紅貼波輕棉白堆案關關南來鶯遙遙北去雁萋萋草  
茸砌陰陰樹隱岸怵然意靡寧遑樂清閒宴繫我非傷  
春所慮壟畝畔枯壤久待澤終風日益扇播種惟茲時  
過候饑將殍何辜兮吾民涼德增醜面那無補苴策濟  
少而漏半披衣立宵宇明星方爛爛繁慮賡長吟聊用  
攄三嘆

進宮見路旁麥苗待澤孔亟秋禾尚未布種愁焉

有憂賦以自咎

聞人亦有言甲子鮮豐歲彼嬋姁者流復舉史所記云  
堯湯水旱匪為聖德累此論信然乎試思君所司周官  
設三公尚有變理寄矧予實元首休咎徵所致寰宇雖  
恢擴遐邇均在意耕九耒餘三安得稱有備我自去冬  
半顛望三白瑞亦知時尚遙念念頻縈繫侵尋春徂夏  
益覺秋難置憑輿厯枯壤終風動氛翳麥苗將萎黃穀  
種遲布地此責竟誰諉此災皆予戾忸怩對百工不啻

陳六事短什用自咎訟語無倫次

湯泉荷花

暖溜饒地靈勝似遠公社芙蓉綻清和不待朱明夏女  
夷有私鑄相爭木奴冶裊風散芳馨照日含嬌婉却讓  
別浦荷盈盈秋露瀉早盛亦速零寄語附炎者

詣香山禱雨疊舊作初遊香山詩韻

客歲歷招提相隔倏已久赤帝司南方清和斯夏首來  
牟秋已歉布穀時恐後惟民命繫茲恃以餬其口蜥蜴

竟難致空復驗蚪蚪我聞神所妥率在深林藪是地有  
靈潭毋乃蒼龍守但祈溥膏澤屈禮吾何有播之未棲  
田耘之安容手步禱攀煙蘿遑計磴道陡霑衣汗已淋  
舉袂風颺垢飛廉下玄冥轟若雷應吼大士慈悲心甘  
露灑楊柳湏臾遍九垓枯槁蘇東畝旋憇來青軒為啟  
來青牖昨夏喜農時草書懸壁右對之自忸怩不待他  
人醜見理既未確觸物皆成誘返已試品評臧少而多  
否率此致咎徵詎是明神負敢期雨必零尚會雲相偶

秋夜泛湖賦唐文皇爽氣澄蘭沼之句得詩五首

依韻為次

徂雲淨碧天金颿蕩輕爽入夕幾務閒玩此虛明象  
崇舟穩如屋鑑浦平於掌賦詩思其人高山予所仰

琴書樂有餘天水涵無既咽露蛩語饒橫霜鴈聲未四  
時皆有月獨以秋為貴歷歷翠錦堤遞遞芬陀氣

鏡裏坐空澄渺然思與凝竭來青雀舫愛此玉壺冰衣  
袂皆無滓胸懷亦絕勝蓬瀛原不遠咫尺有人登

遙疑霞有脚却過蓼花灘蟬韻將辭柳荷香尚賽蘭晚  
山歸靜寄秋月本澄觀稍適清閒宴匪尋長夜歡  
讓月雲歸岫報秋波澈沼將圓未滿規歷漢常移秒此  
夕夫如何萬里明未了姮娥憶貞觀不改天心皎

七月二十八日恭奉

皇太后進宮路旁禾黍與與入覽欣此西成稍紓望歲  
賦詩誌喜亦歌其事也

食人食於人事殊心則同較課雨與晴均此望歲功憶

我春夏交雲漢歌蘊隆殷憂厯

慈寧步禱誠乃通東阡霑霖霖南畝紓蟲蟲起枯而蘇  
槁額手感彼

穹朝穠飽玉露午顆搖金風高原與下隰一例皆芃芃  
有秋竟可企非余忖度中奉侍

大安輿欣覽穠穠叢

一笑慈顏豫信可慰予秉賦詩誌農要匪為誇年豐

南紅門池上咏



昔來池上遊春日方載陽今來池上遊蒹葭已蒼蒼逝  
者誠如斯因悟往未嘗吹波鯉魚風垂垂蓼影長漁歌  
起煙外鷗波歛河梁清濁誰致然有懷彼滄浪

盆菊

塗龜寧曳尾不慕藏廊廟山木寧棲崖青黃非所好黃  
華隱逸材倜儻寡同調卉譜偶傳名藝苑誰能貌花師  
鮮法眼視比春葩耀杯水引滋溉圓盆作幽隩枝幹受  
束縛猶詡人工妙杞柳為梧捲戕賊豈伊樂繩墨厥天


然俯仰任其詔垂頭綻冷芳恐被柴桑笑剪翅來孤鶴  
引吭一相弔

順義縣行宮作

將為田監行趣此秋成閒旌麾歷冀野輪蹄背湯泉朝  
暾散晏溫入我輿帷暄塗霜帶冷白坂花垂紫殷枯樹  
雀飛飛廣陌兔爰爰芻棚隱茅落罷喘牛高眠困鹿戶  
有積室家章苟完所見扶鳩翁尚鮮怨祁寒由來歲功  
成降康端自天行宮建勝地樹石誠有年葺新成此日

止頓因路便匪誇棟有芝詎必池茁蓮記我書室名是  
處欣隨安明牕受暖曦市語隔煩喧染翰藻思抒習靜  
道心存愜適以為佳奚必居深山

皇清文穎卷首二十



總校官庶吉士

臣

張能照

校對官修撰

臣

張書勲

謄錄監生

臣

蔣大鎔